

hopohapo ano tatou kia ratau. Kaua ianei e nui noatu ta tatou ngohengohe ki te matua onga wairua kia ora? ” E ai ki ta enei karaipiture, he Matua to tatou, he Atua hoki kei te rangi. E rereke ana ranei i ta nga tupuna o namata o te iwi Maori? Kahore rapea, e rite tonu ana. Na ko te whakahoki tenei o te patai tuatahi, ara i haere mai tatou i whea? I haere mai i te rangi: he tamariki na te Atua.

(*Taria te roanga.*)

HE MIHI KI Nga TAMARIKI.

Ki te Etita.

TENA KOE. Whakaaturia ki nga tamariki o te iwi Maori nga mihi a nga tamariki pakeha o te Kura Ratapu o Ormondville ki a ratou. I konei a Kenana Ata Wiremu e whakahaere ana i te Mihana i te 9 ki te 16 o nga ra o Maehe, a i tae atu ia ki te Kura Ratapu i nga Ratapu e rua. I whakatu ia i nga Himene e waiatatia ana e nga tamariki Maori me te whakaaro nui o etahi tamariki ki to tatou Ariki atawhai. Kei te mihi atu nga tamariki pakeha o nga Kura Ratapu o Ormondville me Mokotuku ki nga tamariki o nga Kura Ratapu Maori. Hei tohu mo to ratou aroha kua tapaea ta ratou ohaoha o te Ratapu nei te 16 o nga ra o Maehe mo nga mahi o te Mihana ki nga Maori.

Kia mau te mahara ki te aroha nui o to tatou Ariki, e rite tahi nei tona aroha ki nga tamariki Maori me nga tamariki pakeha.

Heoi ano. Kia tau nga manaakitanga a te Ariki ki nga tamariki Maori katoa.

Na nga Kai-whakahaere o nga Kura Ratapu—

Makotuku: Louisa Fothergill.

Ormondville: Annie Webb.

[Ko te aroha a nga tamariki (apiti ki nga Matua) i tapae ai ki a Kenana Ata Wiremu e £9. Kia ora nga tamariki pakeha e aroha nei ki o koutou taina o te iwi Maori.—*Etita.*]

TE WHEA PANGO ?

Ki te Etita.

TENA KOE. Tenei he whakahoki i nga patai a te tangata nei a Akapita Hamuera Pango, kaore nei ia e whakahe ana i nga korero a Pirika te Miroi, me wa Tutane kai Pokaihanu, me wa Te Rire, engari e whakamihi ana ia.

Mo tana patai 6 i te wharangi o *Te Toa Takitini* o Aperira; he aha te turanga o Ngahuruhuru Pango i roto i te iwi? Taku whakahoki he rangatira ope. Koia hoki te tangata i haere ki Ngapuhi i riro ake ai te kuia o Akapita, ara a Parewahaika me etahi atu.

Mo te Tuawaru o ana patai. Atikoia na wai te 27 paati o te Wharekarakia i Ohinemutu. Tirohia te meneti puka o Rotorua, ko Pererika Ngahuruhuru kai roto i te taitara o taua 27